

十二佛名神呪校量功德除障滅罪經

隋天竺三藏法師闍那崛多初譯

我闍那崛多 敬禮常住體 徧滿於法界
毗盧遮那佛

如是我聞一時婆伽婆住王舍城耆闍崛山

中與大比丘衆千二百五十人俱復有菩薩
大衆一萬二千人俱阿逸多菩薩爲首爾時
世尊告彌勒菩薩言彌勒東方去此佛刹有
十不可說諸佛刹億百千微塵等過諸佛刹
有一佛土名曰解脫主世界彼世界內有一

佛名曰虛空功德清淨微塵等目端正功德
相光明華波頭摩瑠璃光寶體香最上香供
養訖種種莊嚴頂髻無量無邊日月光明願
力莊嚴變化莊嚴法界出生無障礙王如來
阿羅訶三藐三佛陀見在隨心欲行逍遙在

處說法若善男子善女人犯四重五逆誹謗

能九

三寶及犯四波羅夷是人罪重假使如閻浮
履地變爲微塵一一微塵成於一劫是人
若干劫罪稱是一佛名號禮一拜者悉得滅
除沉復晝夜受持讀誦憶念不忘者是人功
德不可思議而彼佛世界中有菩薩名無比
無障礙王如來授彼菩薩記當得成佛號毫
相日月光明焰寶蓮華堅如金剛身毗盧遮
那無障礙眼圓滿十方放光照一切佛刹相
王如來阿羅訶三藐三佛陀善逝世間解無
上士調御丈夫天人師佛世尊彼東方復有
佛名曰一切莊嚴無垢光如來阿羅訶三藐
三佛陀亦應當稱彼佛名亦修恭敬亦須稱
其名號亦須心念彼佛名號南方有佛名曰
辯才瓔珞思念如來阿羅訶三藐三佛陀亦

應當稱彼佛名亦修恭敬亦須稱其名號亦須心念彼佛名號西方有佛名曰無垢月相王名稱如來阿羅訶三藐三佛陀亦應當稱彼佛名亦修恭敬亦須稱其名號亦須心念彼佛名號北方有佛名曰華莊嚴作光明如來阿羅訶三藐三佛陀亦應當稱彼佛名亦修恭敬亦須稱其名號亦須心念彼佛名號東南方有佛名曰作燈明如來阿羅訶三藐三佛陀亦應當稱彼佛名亦修恭敬亦須稱其名號亦須心念彼佛名號西南方有佛名曰寶上相名稱如來阿羅訶三藐三佛陀亦應當稱彼佛名亦修恭敬亦須稱其名號亦須心念彼佛名號西北方有佛名曰無畏觀如來阿羅訶三藐三佛陀亦應當稱彼佛名亦修恭敬亦須稱其名號亦須心念彼佛名

號東北方有佛名曰無畏無怯毛孔不豎名稱如來阿羅訶三藐三佛陀亦應當稱彼佛名亦修恭敬亦須稱其名號亦須心念彼佛名號下方有佛名曰師子奮迅根如來阿羅訶三藐三佛陀亦應當稱彼佛名亦修恭敬亦須稱其名號亦須心念彼佛名號上方有佛名曰金光威王相似如來阿羅訶三藐三佛陀亦應當稱彼佛名亦修恭敬亦須稱其名號亦須心念彼佛名號爾時佛告彌勒若有正信善男子正信善女人稱此十二諸佛名號之時經於十日當修懺悔一切諸罪一切衆生所有功德皆隨喜勸請一切諸佛久住於世以諸善根迴向法界是時即得滅一切諸罪得淨一切業障即得具足成就莊嚴一切佛土成就具足無畏復得具足莊嚴身

相復得具足菩薩眷屬圍繞復得具足無量
陀羅尼復得具足無量三昧復得具足如意
佛刹莊嚴亦得具足無量善知識速得成就
如上所說不增不減在於煩惱中行阿耨多
羅三藐三菩提而得端正可喜果報亦得財
寶充足常生大姓豪族種姓之家身相具足
亦得善和眷屬圍繞爾時世尊重宣此義而
說偈言

若有善男子 若善女人等 受持此佛名
生生世世中 得他人愛敬 光明威力大
生處爲人尊 於後得成佛

佛復告彌勒若有善男子善女人若當受持
此佛名者亦須誦此陀羅尼咒

多經他 一阿含 二摩訶 三漫多目企 四燥
帝育羯帝 五尼陸帝 六尼陸帝鉢脾 七三摩

余祇 八質多毗拔帝 九阿企 十摩企 十一摩陀
彌 十二毗拔帝 十三漫多求彌 十四薩底耶羅彌
十五育王帝 十六鉢育帝 十七醯利彌利摩私隸 十八
阿南迷 十九遮迷 二十頌質智 二十一末質智 二十二
步支 二十三阿羅醯 二十四婆休眇 二十五遮愈伽
羅醯 二十六醯摩婆帝 二十七殊帝摩帝 二十八達
摩真帝 二十九周多朋枳 三十阿毗差脾 三十一阿
羅陀婆叉彌 三十二娑捷陀毗拔帝 三十三那摩
薩婆 三十四佛陀菩提薩多脾毗耶 三十五悉田
妬漫帶波池 三十六佛陀提瑟帝 三十七
爾時世尊說是咒已重說偈言
受持此咒者 得值六十億 現在十方佛
常憶念是人 一切受生處 常遇善知識
心欲所須者 一切皆吉祥 誦此陀羅尼
常生諸佛前 微妙蓮華上 化生不受胎

正念正行意	增長智慧等	一聞悉總持
所聞不忘失	受持此咒者	獲得如是福
誦此佛名者	彼人所生處	遠離諸惡道
速得生善處	得陀羅尼定	最妙最勝處
受持不忘失	乃至於菩提	皆由諸佛名
及以陀羅尼	若人施七寶	滿千萬億刹
受持此佛名	福報過於彼	行於菩提行
恒常識宿命	遠離諸眾難	即得自在處
常生有佛刹	值佛聞正法	得於信行心
得是信心已	常即供養佛	值佛聞法已
心生大歡喜	得見諸佛已	持妙供養具
供養於諸佛	受持佛名者	千萬諸億劫
捨離生死罪	速成於佛道	若人能至心
七日誦佛名	得於清淨眼	能見無量佛
能持此佛名	即得無量福	是人所生處

天人常恭敬	若人持佛名	千萬億劫中
不被他毀辱	一切世界中	名聞悉流布
若人持佛名	千萬億劫中	天人常供養
無有毀之者	速得成佛道	若人持佛名
不生怯弱心	智慧無諂曲	常在諸佛前
若人持佛名	彼人所生處	天龍諸夜叉
乾闥緊那羅	修羅迦樓羅	及摩睺羅伽
人與非人等	常供養是人	若人持佛名
世世所生處	常生富貴家	丈夫相具足
無有慳妬心	猛健好布施	身體諸毛孔
常出諸妙香	口中諸齒間	復出氤氲香
天赤梅檀香	及諸餘香氣	千萬億劫中
常香無斷絕	世世所生處	其聲如梵天
亦如迦陵頻	命命等諸鳥	持法王名者
其福亦如是	若人持佛名	七寶華中生

其華千億葉

威光相具足

若人持佛名

父母諸眷屬

和顏無諍訟

永不生別離

若有諸女人

受持此經者

捨離女人形

轉生智男身

得男子身已

即成於菩提

轉無上法輪

隨意入涅槃

若人持佛名

刀杖不能害

水火不焚漂

縣官不能殺

若人持佛名

眾魔及波旬

行住坐卧處

不能得其便

若人持佛名

世世所生處

身通遊虛空

能至無邊刹

面覩於諸佛

能聞甚深義

彼等無量佛

即知其心意

爲說微妙法

授彼菩提記

得聞授記已

心生大歡喜

即於諸佛教

決定無有疑

彼諸佛世尊

所說甚深法

其人聞法已

受持永不失

於後得成就

六度及諸地

無畏諸力等

衆相及諸好

佛刹及衆生

任意隨所取

能九

生於彼刹中

速能成正覺

轉無上法輪

隨意入涅槃

若有善男子

及善女人等

受持此經者

如上說功德

若持此經者

謹慎莫放逸

聞如前福業

若滿於一劫

若減於一劫

常須勤讀誦

不生懈怠心

我勅有如是

此等諸佛者

常住功德藏

虛空雲中王

常住於彼處

若人聞佛名

一劫減一劫

聞已生敬心

彼是最健人

亦是大智慧

亦是人中最

亦是健丈夫

於世大名聞

是故我今言

彌勒當聽我

有大智慧人

巧解方便者

常勤不放逸

恒近善知識

得聞此經典

後趣菩提道

佛說此經已

彌勒菩薩摩訶薩

及諸菩薩衆

大比丘衆天龍夜叉乾闥婆阿修羅迦樓羅

緊那羅摩睺羅伽人非人等聞佛所說歡喜
奉行

十二佛名神咒校量功德除障滅罪經